

Dada en la çibdat de Barcelona, de yuso de nuestro sello secreto, a veynte e siete dias de Jullio, año de la Natividad del nuestro Señor de mill e quatroçientos e treze años. Rex Ferrandus. Yo Diego Ferrandez de Vadillo, secretario de mi señor el rey de Aragon, la fiz escribir por su mandado.

CCXXIX

1413-VIII-5, S.L.— Juan II a los alcalles y guardas de las sacas para que no sean cobrados los diezmos correspondientes a los quinientos cafises de trigo traídos de Orihuela. (A.M.M. Cart. Real 1411-1429, fol. 11 r.)

Nos el rey, fago saber a vos, los alcalles e guardas de las sacas e cosas vedadas que estades en los puertos de los mis regnos que son en la frontera de Aragon en el obispado de Cartagena, e a los arrendadores, e fieles, e cogedores que avedes de coger e de recbadar en renta o en fialdat o en otra manera qualquier los mis diezmos e aduanas del dicho obispado este año de la fecha desta alvala, e a qualquier de vos quel conçejo, e ofiçiales, e omes buenos de la muy noble çibdat de Murçia me enbiasron dezir que ellos la grand nesçesidat de mengua de pan que es la dicha çibdat, que mandaron conprar de vezinos de la villa de Orihuela quinientos cafises de trigo de quatro fanegas el cafis, e que los fizieron traher de la dicha villa de Orihuela a la dicha çibdat para proveymiento de los vezinos e moradores della, e que me piden por merçed, que pues ellos mandaron conprar e traer el dicho pan para provimiento de los vezinos e moradores de la dicha çibdat, que les fisiese merçed e quita del diezmo e aduana que de los dichos quinientos cafises de trigo avian a pagar por lo traer de la dicha villa de Orihuela a la dicha çibdat de Murçia, e yo tovelo por bien.

Porque vos mando, a todos e a cada uno de vos que non demandedes al dicho conçejo ni a los que troxieron los dichos quinientos cafises de trigo de la dicha villa a la dicha çibdat para proveymiento della el dicho diezmo de los dichos quinientos cafises de trigo, ca yo les fago merçed e quita dello, e por esta mi alvala, mando al mi thesorero o recabdador que fuere de los dichos diezmos e aduanas del dicho obispado de Cartagena este dicho año, e a qualquier dellos que non demanden el dicho diezmo e que los resçiban en cuenta al arendador o arendadores e fieles de los dichos diezmos e aduanas los maravedis que montaren el diezmo e aduana de los dichos quinientos cafises de trigo, e que gelo descabeçen e resçiban en cuenta e en pago de los maravedis que me ovieron a dar por la dicha renta mostrando los dichos arrendadores por testimonio signado de escrivano publico como non resçibieron del dicho conçejo ni de los que lo troxieron el dicho trigo por su mandado a la dicha çibdat para proveymiento della los



maravedis o pan que monto el dicho trigo de los dichos quinientos cafises de trigo, e los unos e los otros non fagades ende al por alguna manera so pena de la mi merçed e de diez mill maravedis para la mi camara.

Fecho çinco dias de Agosto, año del naçimiento del nuestro Señor Ihesucristo de mill e quatroçientos e treze años. Yo Alvar Garçia de Vadillo la fiz escribir por mandado del señor rey de Aragon, tio e tutor de nuestro señor el rey, e regidor de sus regnos. Rex Ferrandus. E en las espaldas deste dicho alvala avia escriptos estos nombres que se siguen: Seguntinus, Per Afan. Registrada.

CCXXX

1413-VIII-12, Illescas.— Juan II al licenciado Marcos Ferrández para que vuelva con las pesquisas que durante tres meses ha hecho en la ciudad. (A.M.M. Cart. Real 1411-1429, fol. 9r-v.)

Don Iohan por la graçia de Dios, rey de Castiella, de Leon, de Toledo, de Gallizia, de Sevilla, de Cordova, de Murçia, de Jahen, del Algarbe, de Algwezira, e señor de Vizcaya e de Molina; a vos, Marcos Ferrandez, liçençiado, salud e graçia.

Bien sabedes como vos enbie por pesquisidor a fazer inquisiciones sobre çiertos casos a la muy noble çibdat de Murçia e a su tierra, e vos mande que estuviesedes en la dicha çibdat e en su tierra faziendo las dichas inquesiciones tres meses, e agora, a los alcalles, e regidores, e ofiçiales, e omes buenos de la dicha çibdat enbiaronme dezir que es ya conplido el tiempo que vos yo mande estar en la dicha çibdat e en su tierra por pesquisidor de los dichos casos, e siete meses mas, e que me pedian por merçed que pues los dichos tres meses en que vos aviades de fazer las dichas inquisiciones era conplido, que vos enbiase mandar que vos viniesedes luego de la dicha çibdat, e por quanto el tiempo que vos yo mande estar en la dicha çibdat es conplido, es mi merçed que vos vengades luego de la dicha çibdat e trayades las pesquisas que tenedes fechas ante los del mi consejo, que estan en Guadalajara, e fagades relaçion dellas porque ellos las vean e fagan sobre ello lo que fuere justiçia, e non fagades ende al so pena de la mi merçed e de diez mill maravedis para la mi camara, porque asy cunple a mi serviçio, e demas sed çierto que de aqui a delante non vos sera dado mantenimiento alguno por la dicha razon, e de como esta mi carta vos fuere mostrada e la cunplieredes, mando sola dicha pena a qualquier escrivano publico que para esto fuere llamado que de ende al que vos la mostrare testimonio signado con su signo porque yo sepa en como conplides mi mandado.

Dada en la villa de Illescas, doze dias de Agosto, año del naçimiento de nuestro Salvador Ihesucristo de mill e quatroçientos e treze años. Yo Alvar Garçia de Vadillo la fiz escribir por mandado del señor rey de Aragon, tio e tutor de

